

12 February 2025

समे 12:25 hrs

<><><><><><>

PM-Marseille

प्रधानमंत्री नरेंद्र मोदी ते फ्रांस दे राष्ट्रपति इमैनुअल मैक्रों होर अज्ज बडुलै दक्खनी फ्रांस च मार्से थाह पुजे जित्थे भारती समुदाय दे लोकें बड़ी गर्मजोशी कन्नै उंदा सोआगत कीता। प्रधानमंत्री मोदी ते राष्ट्रपति मैक्रों होर अज्ज सांझे तौर उप्पर मार्से च भारत दे पैहले नमें कारोबारी सफारतखाने दा उद्घाटन करडन। एह्दे अलावा ओहू होर बी केई कार्यक्रमें च हिस्सा लैडन। प्रधानमंत्री होरें सोशल मीडिया पोस्ट च आखेआ जे इस जात्तरा कन्नै भारत ते फ्रांस बश्कार सरबन्ध होर निगो ते मजबूत होडन। उनें आखेआ जे भारत दा नमां कारोबारी सफारतखाना आपसी सरबन्धें गी मजबूत करोग। श्री मोदी होरें इब्बी दस्सेआ जे ओहू अज्ज पैहले ते दुए विश्व युद्ध च वीरगति गी प्राप्त होए दे भारती सैनिकें गी श्रद्धांजलि देडन। दौनें नेता अंतर्राष्ट्री थर्मोन्यूक्लियर एक्सपेरिमेंटल रिएक्टर दा बी दौरा करडन। एहू इक बहुराष्ट्री पैहल ऐ, जेहदा मकसद वैश्विक लाहू आस्तै परमाणु ऊर्जा दा इस्तेमाल करना ऐ।

<><><><><><>

Shah J&K

केंद्री गृह मंत्री अमित शाह होरें खूफिया जानकारीयां रक्खने दे कम्मै च तकनीकें दे इस्तेमाल पर जोर दित्ता ऐ। कल नमीं दिल्ली च जम्मू-कश्मीर दी मौजूदा सुरक्षा स्थिति दी समीक्षा गितै सद्दी गेदी इक उच्च सतह दी बैठक दी अध्यक्षता करदे होई अमित शाह होरें आखेआ जे आतंकवादिगं गी रपेआ पैसा उपलब्ध करोआने आहलें पर तक्क रक्खना, नशीले पदार्थें ते आतंकवाद दा कारोबार करने आहलें दी नकेल कस्सना ते जम्मू-कश्मीर थवां आतंकवादी ढांचें गी पूरी चाल्ली खत्म करना, प्रधानमंत्री नरेंद्र मोदी हुंदी सरकार दी प्राथमिकता ऐ। बैठक दौरान उनें सब्बनं सुरक्षा एजेंसिगं गी आपूं'चै तालमेल बनाइयै कम्म करने पर जोर पाया। उनें सब्बनं गी सौहगा-सतर्क रौहने लेई बी आखेआ। गृह मंत्री होरें केंद्री रिजर्व पुलिस बल दी स्यालें लेई कार्ययोजना दी बी समीक्षा कीती ते आला अफसरें गी निर्देश दित्ता जे कुसै बी इलाके च उंदी पकड़ ते नियंत्रण च कोई कमी नेई रवै। उनें सी.आर.पी.एफ गी फौज ते जम्मू-कश्मीर पुलिस कन्नै नेड़मा तालमेल बनाइयै कम्म करने दे निर्देश बी जारी कीते।

<><><><><><>

Panchayat-Infra

केन्द्र सरकारै, पिच्छले त्र'ऊं ब'रें दरान जम्मू-कश्मीर च पंचैतें सरबन्धी ढांचे गी तगड़ा बनाने लेई 350 करोड़ 56 लक्ख रपे मंजूर कीते न। आकाशवाणी दे जम्मू संवाददाता दी रिपोर्ट मूजब, केन्द्री पंचैती राज मंत्रालय नै राश्ट्री ग्राम स्वराज अभियान दे तैहत ग्रामीण शासन ते डिजिटल ढांचागत विकास लेई जम्मू-कश्मीर गी सुद्दे फंड अलॉट कीते न। लोकसभा च पेश कीते गेदे अधिकारिक आंकड़ें मूजब, 290 करोड़ 23 लक्ख रपें दी कुल

रकम, पंचैत भवनें दे निर्माण लेई मंजूर कीती गई जिसलै के सांझे सेवा केन्द्रें लेई 164 करोड़ 90 लख रुपें दी रकम अलॉट कीती गई। एहदे अलावा खित्ते च डिजिटल शासन च बाढ़े दे मकसद कन्नै कम्प्यूटर उपलब्ध करोआने लेई 6 करोड़ 31 लख रुपें दी रकम बक्ख बी रक्खी गई।

<><><><><><>

MVUs in J&K

केन्द्र शासित प्रदेश जम्मू-कश्मीर च वैटरनरी अस्पतालें ते डिसपेंसरिएं सरबन्धी बवस्था दी स्थापना ते इनें'गी तगड़ा बनाने मतल्लक योजना तैहत गश्ती वैटनरी युनिटें दे विस्तार च बड़ा मता बाढ़ा दर्ज कीता गेआ ऐ। मच्छी पालन, पशुपालन ते डेयरिएं सरबन्धी मंत्रालय दी रिपोर्ट मूजब, जम्मू-कश्मीर लेई 6 गश्ती वैटनरी युनिट मंजूर कीते गे हे पर सरकारै कुल 50 युनिटें गी चालू कीता ऐ। केन्द्र सरकारै इस योजना तैहत जम्मू-कश्मीर लेई 13 करोड़ 33 लख रुपे मंजूर कीते ते केन्द्र शासित प्रदेश दे प्रशासन नै बाद्दू 44 गश्ती वैटनरी युनिटें दा खर्चा आपूं झल्लेया ऐ। जम्मू-कश्मीर च जित्थे 7 ज्हार 148 करसानें इ'नें गश्ती वैटनरी युनिटें थमां लाह हासल कीता उत्थे गै लद्दाख च छड़े 448 लाभार्थिएं, एहदा फायदा ठोआया। होरनें राज्यें जि'आं उत्तर प्रदेश च 2 करोड़ 19 लख लाभार्थिएं ते राजस्थान च 7 लख 47 ज्हार लाभार्थिएं गी इस योजना थमां लाह हासल होआ।

<><><><><><>

Vaishnav-Semiconductor

इलेक्ट्रानिक्स ते सूचना टेक्नोलॉजी मैहकमे दे केन्द्री मंत्री अश्विनी वैष्णव होरें आखेआ जे लैम रिसर्च नै भारत च 10 ज्हार करोड़ रुपें शा मते दी रास-पूँजी लाने दा ऐलान कीता ऐ। इक सोशल मीडिया पोस्ट च इस बारै जानकारी सांझी करदे होई मंत्री होरें आखेआ जे एहू पैहलकदमी भारत दी सेमीकंडक्टर जात्तरा च इक होर संगेमील ऐ। उ'नें आखेआ जे एहू गैहू प्रधानमंत्री हुंदे सेमीकंडक्टर दे विजन पर दुनिया दे भरोसे गी दर्शादी ऐ।

<><><><><><>

Mahakumbh

प्रयागराज दे महाकुम्भ च माघ म्हीने दी पुन्नेया दे मौके पर अज्ज विशेष स्नान जारी ऐ। इस विशेष स्नान दा बड़ा मता अध्यात्मिक महत्व ऐ कीजे एहदे कन्नै कल्पवास अनुष्ठान दी बी समाप्ति होई जंदी ऐ। इस बारी 10 लख शा बहू लोक कल्पवास करा'रदे ना। ऐसी मान्यता ऐ जे प्रयागराज च संगम दे कंडे कल्पवास करने कन्नै मोक्ष दी प्राप्ति हुंदी ऐ। एहदी पच्छोक्कड़ै च उत्तर प्रदेश सरकारै उत्थे सुरक्षा दे पुख्ता बंदोबस्त कीते देन ते विशेष ट्रैफिक बवस्था बी कीती गेदी ऐ।

<><><><><><>

Beautician-Course

दक्खनी पीर पंजाल खित्ते च महिलाएं गी सशक्त बनाने दी इक बड़ी पैहलकदमी दे तैहत भारती फौजै रजौरी जिले दे पालमा इलाके च साज-श्रृंगार सरबन्धी ब्यूटीशियन सिखलाई कोर्स दा आयोजन कीता।

एह जतन, ओकड़ी पैहलकदमी दा इक हिस्सा ऐ जेहदे तैहत ग्रामीण इलाके दिऐं महिलाएं गी सशक्त बनाइयै उनें'गी उंदे अपने पैरें पर खड़ोने-जोग बनाना जा करदा ऐ। त्र'ऊं म्हीनें दा एह कोर्स, इ'नें महिलाएं लेई मुफ्त आयोजित करोआया गेआ ते इस दरान उनें'गी बाल बनाने, श्रृंगार, ते होर दुए सरबबंधत कम्में दी सिखलाई दित्ती गेई।

<><><><><><>